

四庫全書

集部

欽定四庫全書

集部

禪月集卷

十九至
二十六

詳校官司業_臣納麟寶

檢討_臣何思鈞覆勘

總校官進士_臣朱 鈐

校對官待詔_臣胡士震

謄錄監生_臣王志遠

欽定四庫全書

禪月集卷十九

唐 釋貫休 撰

七言律詩

蜀王入大慈寺聽講

天復三年作

玉節金珂響似雷
水晶宮殿步徘徊
祇緣支遁談經妙

所以許詢都講來
帝釋鏡中遙仰止

善法堂前有七寶鏡照四天下 魔

軍殿上動崔巍
千重香擁龍鱗立
五種風生錦繡開

上界

天王欲下遊行時先有三種風生一開其樓
臺殿閣二香氣芬馥三吹去萎花更雨新者
生日月秀如四岳出塵埃一條紫氣隨高步九色仙花
落古臺謝太傅須同八凱姚梁公可並三台登樓喜色
禾將熟望國誠明首不迴駕馭英雄如赤子雌黃賢哲
貢瓊瑰六條消息心常苦一劍晶熒敵盡摧木鐸聲中
天降福景星光裏地無災百千民擁聽經座始見重天
社稷才

蜀王登福感寺塔三首

天資忠孝佐金輪香火空王有宿因此世喜登金骨塔
前生應是育王身

佛記育王造
四萬八千塔

封疆歲暮笙歌合襦袴

正初錦繡新釋子沾恩無以報祇擎章句貢平津

又

似聖悲增道不窮憂民憂國契堯聰兩髯有雪丹霄外
萬里無塵一望中南照微明連莽蒼峨嵋擁秀接崆峒
林僧歲月知何幸還似支公見謝公

又

步步層層孰可陪相輪邊日照三台喜歡烝庶皆相逐
惆悵鸞輿尚未迴金鐸撼風天樂近仙花含露瑞烟開
一年一度常如此願見文翁百度來

少監三首

器琢仙珪美有餘席珍國寶比難如銜花乳燕看調瑟
衣錦佳人侍讀書荀氏門風龍變化謝家庭樹玉扶疎
即期寰宇隆平日歸佐吾皇侍玉墀

又

益友相隨益自強趨庭問禮日昭彰袍新宮錦千人目
馬駿桃花一巷香偏愛曾顏終不及或如韓白亦無妨
八龍三虎森如也萬古千秋瑞聖唐

又

具體而微太少年鳳毛五色帶非烟倚天長劍看無敵
遶樹號猿已應絃接士開襟清聖熟分題得句落花前
即應出將傳家法聖澤恩波浩浩然

再到鍾陵作

六七年來到豫章舊遊知己半凋傷春風還有花千樹
往事都如夢一場無限丘墟侵郭路幾多臺榭浸湖光
祇應惟有西山色依舊崔巍上寺橋

行經弟妹墳

淚不曾垂此日垂山前弟妹塚離離年長於吾未得力
家貧拋爾去多時鴻衝碧漢霜中斷蕙雜黃蒿塚上衰
恩愛苦情拋未得不堪回首步遲遲

到蜀與鄭中丞相遇

深隱猶為未死灰，遠尋知己遇三台。
如何麋鹿羣中出，又見鸛鷺天上來。
劍閣霞粘殘雪在，錦江香甚百花開。
謾期王謝來相訪，不是支公出世才。

別馮使君

瓦礫文章豈有媒，兩三年祇在金臺。
本師頭白須歸去，太守門清願再來。
皓皓玉霜孤鴈遠，蕭蕭松島片帆開。
從茲林下終無事，惟祇焚香祝上台。

上新定宋使君

禪坐吟行誰與同杉松共在寂寥中碧雲詩裏終難到
白藕花經講始終水疊山層擎草疏砧清月苦立霜風
十年勤苦今酬了得句桐江識謝公

和李判官見新榜為兄下第

失意荆枝滴淚頻陟岡何翅不知春心中岐路平如砥
天上文章妙入神休說宋風迴鷁首即看雷火燎龍鱗
從茲相次紅霞裏留取方書與世人

送羅鄴赴許昌辟

方得論心又別離黯然江上步遲遲不堪回首崎嶇路
正是寒風皺錯時美似郝超終有日去依劉表更何疑
前程不少南飛鴈聊寄新詩慰所思

附錄韋相公莊寄禪月大師

新春新霽好晴和間闊吾師鄙吝多不是為窮常見
隔紙應嫌醉不相過雲離谷口俱無著日到天心各
幾何萬事不如碁一局雨堂閒夜許來麼

酬韋相公見寄

鹽梅金鼎美調和詩寄空林問訊多秦客奕碁拋已久
楞嚴禪髓更無過萬般如幻希先覺一丈臨山且奈何
日到天心乃相公之日
老僧日去山乃一丈耳空諷平津好珠玉不知更得及

門麼

附錄張相公格寄禪月大師

龍華咫尺斷來音日夕空馳詠德心禪月字清師號
別壽春詩古帝思深畫成羅漢驚三界書似張顛值
萬金莫倚名高忘故舊晚晴閒步一相尋

酬張相公見寄

周郎懷抱好知音常愛山僧物外心
閉戶不知芳草歇無能惟擬住山深
感通未合三生石豔雅歡擎九轉金
但似前朝蕭傲與蔣紳老僧風雪亦相尋

附錄王相公錯贈禪月大師

常愛吾師性自然天心明月水中蓮
神通力遍恒沙外詩句名高聚米前
尋訪不聞朝振錫修行惟說夜安禪
太平時節俱無事莫惜時來話草玄

酬王相公見贈

孤拙將來豈偶然不能為漏滴青蓮一從麟筆題牆後
常祇冥心古像前九德陶鎔空有跡六憲清淨始通禪
今朝幸捧瓊瑤贈始見玄中更有玄

附錄集賢周相公庠寄禪月大師

昨日塵遊到幾家就中偏有近宣麻水田鋪座時移
畫金地譚空說盡沙傍竹欲添犀浦石栽松更碾味
江茶有時捨得休公卷倚柱閒吟見落霞

酬周相公見贈

三界無家是出家豈宜拊鳳覩新麻幸生白髮逢金聖
曾夢青蓮映玉沙境陟名山烹錦水睡忘東白洞平茶
喜擎繡段攀金鼎謝朓餘霞始是霞

七言絕句

道情偈三首

崆峒老人專一一黃梅真叟却無無獨坐松根石頭上
四溟無限月輪孤

又

非色非空非不空
空中真色不玲瓏
可憐盧大擔柴者
拾得驪珠索箇中

又

優鉢羅花萬劫春
頻犁田地絕纖塵
道吾道者相招好
不是香林採葉人

馬上作

柳岸花隄夕照紅
風清襟袖響璁瓏
行人莫訝頻迴首

家在凝嵐一點中

道中逢乞食老僧

赤椽欄笠眉毫垂拄柳栗杖行遲遲時人祇施盂中飯
心似白蓮那得知

秋末寄武昌一公

見說武昌江上住柏枯槐朽戰時風知師詩癖難醫也
霜灑蘆花明月中

陋巷

墜葉如飛欲滿溝
破籬荒井一蟬幽
亦知希驥無希者
作麼令人強轉頭

終南僧

聲利掀天竟不聞
草衣木食度朝昏
遙思山雪深一丈
時有仙人來打門

禪月集卷十九

欽定四庫全書

禪月集卷二十

唐 釋貫休 撰

七言律詩

大蜀皇帝潛龍日述聖德詩五首

嶽瀆殊祥日月精入堯金鏡佐休明
衣嚴黼黻皇恩重
劔折芙蓉紫氣橫玉甃金湯山岳峻
花藏臺榭管絃清
已聞圖上凌烟閣寵渥穹隆玉不名

又

扶持社稷似齊桓百萬雄師貴可觀
神智發中真莫測
貢輸天下學應難
風清輦角山河壯
劍肅神龍草木寒
堪羨蜀民恒有福
太平時節一般般

又

珠履三千侍玉除
宮花飄錦早鶯初
雖然周孔心相似
其奈龔黃政不如
浩浩歌謠聞禁掖
重重襦袴溷樵漁
若論朝野艱難日
第一之功美有餘

又

紫髯青眼代天才
韓白孫吳稍可陪
祇見赤心堯日下
豈知真氣梵天來
聽經瑞雪時時落
登塔天花步步開
盡祝莊椿同壽考
人間歲月豈能催

又

丈夫勛業正乾坤
麟鳳龜龍盡在門
西伯最憐耕讓畔
曹參空愛酒盈樽
心慈為受金僊囑
髮白緣酬玉砌恩
從此于門轉高大
可憐子子與孫孫

陳情獻蜀皇帝

河北江東處處災唯聞全蜀勿塵埃一餅一鉢垂垂老
千水千山得得來柰苑幽栖多勝景巴歛陳貢媿非才
自慙林藪龍鍾者亦得親登郭隗臺

壽春節進大蜀皇帝五首

上玄大帝降坤維箕尾為臣副聖期豈比赤光盈室日
全同白象下天時文經武緯包三古日角龍顏遏四夷
今日降神天上會願將天福比須彌

又

異香滴露降紛紛紫電環樞照禁門先冠百王臨億兆
後稱十號震乾坤羲軒之道方為道草木沾恩始是恩
今以諛才歌睿德猶如飲海妙難論

又

茂祉遐宣勝事并薰風微入舜絃清四洲不必歸王化
一統那能計聖情合合鼓鐘膏雨滴峩峩宮闕瑞烟橫
西逾昆岳東連海誰不梯山賀聖明

又

遠人玉帛盡來歸及物天慈物物肥
春力遍時皆甲拆
王言聞者盡光輝
家家錦繡香醪熟
處處笙歌乳燕飛
為報蜀皇勤禱祝
聖明天子古今稀

又

積劫修來似煉金
為皇為帝萬靈欽
能當濁世為清世
始見君心是佛心
九野黎民耕浩浩
百蠻朝騎日駸駸
今朝獻壽將何比
願似莊椿一萬尋

對雪寄新定馮使君二首

仙掌空思歸未能
焚香冥目對殘燈
豈知瑞雪千山合
空覺春寒半夜增
翳月素雲埋粉蝶
堆巢孤鶴下金繩
因思太守憂民切
吟對瓊枝喜不勝

又

政化由來通上靈
豐年祥瑞滿牕明
氣嚴坐久燈凝燄
片大更深屋作聲
飄掩烟霞何處去
欹斜杉竹向簾傾
雪中客雖無事
還有新詩半夜成

送劉相公朝覲二首

九苞仙瑞曜垂衣一品高標百辟師魏相十思常自切

曹溪一句幾生知

公深入禪理

久交玉帳雖難別須佐金輪

去已遲唯杜荊州最惆悵柳門迴首落花時

又

急徵祇是再登庸生意人心萬國同變理久徵殷傳說
譚真欲過李玄通程穿峴首春光老馬速商於曙色紅
從此龍顏又應瘦寰瀛俱荷代天功

避寇遊成福山院

成福僧留不擬歸，獼猴菌嫩豆苗肌。
那堪蠶月偏多雨。

況復衢城未解圍。

時孫端國逼衢城數月

翠擁槿籬泉亂入，雲開

花島雉雙飛。堪嗟大似悠悠者，祇向詩中話息機。

別李常侍

楚水和烟海浪通，又擎杯錫去山東。
道情雖擬攀孤鶴，詩業那堪至遠公。
夢入深雲香雨滴，吟搜殘雪石林空。
朱門再到知何日，一片征帆萬里風。

送鄭閣赴閩辟

便便書腹德無鄰，健筆從知又入閩。
鸚鵡才須歸紫禁，真珠履不稱清貧。
武夷山夾仙霞薄，螺女潭通海樹春。
從此應多好消息，莫忘江上一閒人。

寄信州張使君

水壇檉殿地含烟，領鶴行吟積翠間。
數閣涼颺終日去，滿懷明月上方還。
時來自有鸚鵡識，道在從如草木閒。
唯羨靈溪賢太守，一麾清坐似深山。

春末寄周璉

暮角含風雨氣曛寂寥莓翠上衣巾道情不向鶯花薄
詩意自如天地春夢入亂峰仍履雪吟看芳草祇思人
手中孤桂月中在來聽泉聲莫厭頻

讀吳越春秋

猶來吳越盡須慙背德違盟又信讒宰嚭一言終殺伍
大夫七事祇須三功成獻壽歌飄雪誰愛扁舟水似藍
今日雄圖又何在野花香逕鳥喃喃

春遊靈泉寺

水蹴危梁翠擁沙
鐘聲微逕入深花
嘴紅澗鳥啼芳草
頭白山僧自扞茶
松色摧殘遭賊火
水聲幽咽落人家

寺因泉得名自經沙汰其泉落在人家
因尋古跡空惆悵
滿袖香風白日

斜

七言絕句

歸東陽臨岐上杜使君七首

小謝清高大謝才
聖君令泰比方來
一從到後常無事

鈴閣公庭滿綠苔

又

紅錦帳中歌白雪
烏皮几畔撫青英
不知何物為心地
賽却澄江澈底清

又

誰報田中有黑蟲
一家齋戒減仙容
分憂若也皆如此
天下家家有剽春

又

憂民心切出衝炎禾稼如雲喜氣兼林下閒人亦何幸

也隨旌旆到銀尖

銀尖去郭二十里

又

方恐獄中桃樹出忽聞枯木却生烟

時有枯木再生

禘祥為郡

曾如此却恐當時是偶然

又

枯骨縱橫遍水湄盡收為塚碧參差分明為報精靈輦

好送旌旗到鳳池

又

捨魯依劉一片雲好風吹去遠纖塵猶期明月清風夜
來作西園第八人

禪月集卷二十

欽定四庫全書

禪月集卷二十一

唐 釋貫休 撰

七言律詩

春

自來自去動洪爐無象無私無處無迴鴈不多消氣力
染花應最費工夫溟濛偏恨豪家惜濃暖深為政筆驅
莫訝相逢只添睡伊余心不在榮枯



聞迎真身

四海無波八表臣恭聞今歲禮真身七重鑱未開金鑰
五色光先入紫宸丹鳳樓臺飄瑞雪岐陽草木亞香塵
可憐優鉢羅花樹三十年來一度春

灞陵戰叟

劔剗秋水髻梳霜迴首霜天與恨長官竟不封右校尉
鬪曾生挾左賢王尋班超傳空垂淚讀李陵書更斷腸
今日灞陵陵畔見春風花霧共茫茫

遇道者

鶴骨松筋風貌殊不言名姓絕榮枯尋常藜杖九衢裏
莫是高山一皓無身帶烟霞游汗漫藥兼神鬼在葫蘆
只應張果丈公輩時與相逢醉海隅

贈鍾陵陳處士

否極方生社稷才唯譚帝道郗梯媒高吟千首精怪動
長嘯一聲天地開湖上獨居多草木山前頻醉過風雷
吾皇仄席求賢久莫待徵書兩度來

懷鄰叟

常思東溪厖眉翁是非不解兩頰紅
桔槔打水聲戛戛紫芋白薤肥濛濛
鷗鴨靜遊深竹裏兒孫多
在好花中千門萬戶皆車馬誰愛如斯太古風

贈軒轅先生

曾親文景上金鑿語共容城語一般
久向紅霞居不出若非清世見應難
滿鑪藥熟分仙盡幾局碁終看海乾
略問先生真甲子只言弟子是劉安

偶作因懷山中道侶

是是非非竟不真
桃花流水送青春
姓劉姓項今何在
爭利爭名愁殺人
畢竟輸他常寂寞
只應贏得苦沈淪
深雲道者相思否
歸去來兮湘水濱

送新羅人及第歸

捧桂香和紫禁烟
遠鄉程徹巨鼇邊
莫言掛席飛連夜
見說無風即數年
衣上日光真是火
島旁魚骨大於船
到鄉必遇來王使
與作唐書寄一篇

送新羅衲僧

扶桑枝西真氣奇
古人呼為師子兒
六環金錫輕擺撼
萬仞雪嶠空參差
枕上已無鄉國夢
囊中猶挈石頭碑

南岳石頭大師劉
珂郎中作碑文也

多慙不便隨高步
正是清風無事時

春晚桐江上閒望作

江上車聲落日催
紛紛擾擾起紅埃
更無人望青山立
空有帆衝夜色來
沙鳥似雲鐘外去
汀花如火雨中開
可憐瀟灑鴟夷子
散髮扁舟去不迴

商山道者

五千言外得玄音
石屋寒栖隔雪林
多傍松風梳綠髮
只燒崖藥點黃金
澄潭龍氣來縈砌
月冷星精下聽琴
曾夢先生非此處
碧桃溪上紫烟深

隔一作得

聞許崇及第因寄桂雍

時清道合出塵埃
清苦為詩不仗媒
今日桂枝平折得
幾年春色併將來
勢扶九萬風初極
名到三山花正開
更有平人居蟄屋
還應為作一聲雷

澱江秋居作

無事相關性自攄
庭前拾葉等閒書
青山萬里竟不足
好竹數竿涼有餘
近看老經皆澹泊
欲歸少室復何如
面前小沼清如鏡
終養琴高赤鯉魚

上縉雲段使君

清畏人知人盡知
縉雲三載得宣尼
活民刀尺雖無象
出世文章豈有師
木氣芝香粘甕榼
雲痕翠點滿旌旗
今朝暫到金臺上
頗覺心如太古時

春末蘭溪道中作

山花零落紅與緋汀烟濛茸江水肥人擔初鋤細雨歇
路入桑柘斜陽微深喜東州云寇去不知西狩幾時歸
清平時節何時是轉覺人心與道違

野居偶作

高淡清虛即是家何須須占好烟霞無心於道道自得
有意向人人轉賒風觸好花文錦落砌橫流水玉琴斜
但令如此還如此誰信前程未可涯

七言絕句

再遊東林寺作五首

臺殿參差聳瑞烟
桂花飄雪水潺潺
莫疑遠去無消息

七萬餘年始半年

傳記盡云安遠持炭三車盡生兜率天人間四千年彼天一晝夜亦三十

日為一月十二月為一年壽四千歲

又

桓玄舊輦殘雲濕
耶舍孤墳落照遲

昔桓玄入山禮遠公遂舍輦至今在

遠公堂下有箇山僧倚松睡
恐人來取白猿兒

又

玉像珠龕香陣橫
錦霞多傍石牆生
辟蛇行者今何在
花外唯聞鳩鳥聲

又

愛陶長官醉兀兀
送陸道士行遲遲
買酒過溪皆破戒

斯何人斯師如斯

遠公高節食後不飲而將詩博綠醕與陶潛飲別人不得又送客不以貴

賤不過虎溪只在寺門前而送陸靜修道士過虎溪數百步今寺門前有道士周送道士至此止也

又

白簷蔔花露滴滴紅
芘芘草香濛濛田地更無塵一點
是何人合住其中

題蘭江言上人院二首

時王謁先輩有詩二首題其院因和題之

一生只著一麻衣
道業還欺習彥威
手把新詩說山夢
石橋天柱雪霏霏

又

只是危吟坐翠層
門前岐路自崩騰
青雲名士時相訪
茶煑西峰瀑布冰

書石壁禪居屋壁

赤旃檀塔六七級白苗苗花三四枝
禪客相逢祇彈指
此心能有幾人知

送人遊茅山

茅真舊宅基猶在藥竈苔深土尚殷
君見道人憑與問
大還還字若為還

聽僧彈琴

家近吳王古戰城海風終日打檣聲
今朝鄉思渾堆積

琴上聞師大懈行

禪月集卷二十一

欽定四庫全書

禪月集卷二十二

唐 釋貫休 撰

七言律詩

中秋十五夜月

巽雪噴霜滿碧虛
王孫公子翫相呼
從來天匠為輪足
自是人心此夜餘
靜入萬家危露滴
清埋衆象叫鴻孤
坐來惟覺情無極
何況三湘與五湖

鷺鷥有懷

前東陽王慥使君
養一鷺鷥名瑤花

粉魄霜華為爾枯，鴛鴦相伴更堪圖。
愛來沙島遺銀屋，終作金籠養雪雛。
栖宿必多清瀨夢，品流還次白猿徒。
今朝不覺頻回首，曾伴瑤花近玉壺。

東陽懼亂後懷王慥使君五首

昨來祇對漢諸侯，勝事消磨不自由。
裂地鼓鼙軍羽急，連天烽火陣雲秋。
吹毛淬劍雖無數，歃血為盟不到頭。
誰為今朝奉明主，使君司戶在隋州。

時黃巢奔許公點
土勇救萬傑押于

軟血連西而渠魁詐降都將連城為盟違
約遂於成地當不與衛睦杭守同貶中也

又

只報精兵過大河東西南北殺人多可憐白日渾如此
來似蝗蟲爭奈何天意豈應容叛亂人心都改太凋訛
不勝惆悵還惆悵一曲東風月勝歌

又

為郡無如王使君一家清冷似雲根貨財不入崔洪口
俎豆嘗聞夫子言鬚髮坐成三載雪黎民空負二天恩

合少四八
卷二十二
不堪西望西風起縱火崑崙誰為論

又

魄懾魂飛骨亦銷此魄此魄亦難招黃金白玉家家盡
繡闥雕甍處處燒驚動乾坤常黯慘深藏山岳亦輕搖
恭聞國有英雄將擬把何心答聖朝

又

不是龔黃覆育才即須清苦遠塵埃無人與奏吾皇去
致亂唯因酷吏來剝剝生靈為事業巧通豪譖作梯媒

令人轉憶王夫子一片真風去不迴

秋夜懷嵩少因寄洛中舊知

鑪爇旃檀不稱貧霏霏玉露濕禪巾
紫金地上三更月紅藕香中一病身
少室少年偏入夢多時多事去無因
如今憔悴頭成雪空想嵯峨羨故人

避地毗陵寒月上孫徽使君兼寄東陽王使君三首

一到毗陵心更勞
冷吟閒步擁雲袍
豈緣思妙塵埃少

自是風清物態高野色疎黃連楚甸故山奇碧隔河橋
終須愚谷中安致不是人間好羽毛

又

常憶雙溪八詠前講詩論道接清賢文欺白鳳真難及
藥撚紅蕖豈偶然花濕瑞烟粘玉磬簾垂幽鳥啄苔錢
自憐不是悠悠者吟嚼真風二十年

又

殷雷車雨滴階聲寂寞焚香獨閉扃錦繡文章無路達

袴襦歌詠隔牆聽松聲冷浸茶軒碧苔點狂吞衲線青
唯有孤高江太守不忘病客在禪靈

秋末寄上桐江馮使君

山東山色勝諸山謝守清高不可攀薄俗盡于言下泰
苦心唯到醉中間香凝錦帳抄書後月轉棠陰送客還
野客沾恩歸未得蕭蕭霜葉滿柴關

七言絕句

禪師

擊鼓求亡益是非木中生火更何為吾師別是醜翻味
不是知心人不知

道士

花鳥相逢滿袖雲藉花論道過金巾騰騰又入仙山去
只恐是青城丈人

風琴

至境心為造化功一枝青竹四絃風寥寥雙耳更深後
如在緱山明月中

庭橘

蟻踏金苞四五株
洞庭山上味何殊
不緣松樹稱君子
肯便甘人喚木奴

落花

蝶醉蜂癡一簇香
繡葩紅帶墮殘芳
因嗟好德人難得
公子王孫盡斷腸

孤雲

將比鷺鷥還恐屈
始思殘雪不如多
清風相引去更遠

皎潔孤高奈爾何

苦吟

河薄星疎雪月孤
松枝清氣入肌膚
因知好句勝金玉
心極神勞特地無

古戰處

鬼氣蒼黃棘葉紅
昔時人血此時風
相憐極目無疆地
曾落將軍一陣中

偶然作

蟬聲引出石中蛩寂寞門扃葉數重誰道思山心不切
等閒盡出兩三峰

招友人宿

銀地無塵金菊開紫梨紅棗墮莓苔一泓秋水一輪月
今夜故人來不來

禪月集卷二十二

欽定四庫全書

禪月集卷二十三

唐 釋貫休 撰

七言律詩

山居詩二十四首 并序

序曰愚咸通四五年中於鍾陵作山居詩二十四章放筆藁被人將去厥後或有散書于屋壁或吟咏於人口一首兩首時時聞之皆多字句

舛錯洎乾符辛丑歲避寇於山寺偶全獲其本
風調野俗格力低濁豈可聞於大雅君子一日
抽毫改之或留之除之修之補之却成二十四
首亦斐然也蝕木也槩山謳之例也或作者氣
合始為一朗吟之可也

休話誼譁事事難山翁只合住深山數聲清磬是非外
一個閒人天地間綠圃空階雲冉冉異禽靈草水潺潺
無人與向羣儒說巖桂高枝亦好扳

又

難是言休即便休清吟孤坐碧溪頭三間茆屋無人到
十里松陰獨自遊明月清風宗炳社夕陽秋色庾公樓
修心未到無心地萬種千般逐水流

又

好鳥聲長睡眠好茶擎乳坐莓苔不聞榮辱成番盡
只見熊羆作隊來詩裏從前欺白雪道情終遣似嬰孩
由來此事知音少不是真風去不迴

又

萬境忘機是道華碧芙蓉裏日空斜幽深有徑通仙窟
寂寞無人落異花掣雷溪雲真好喻如龍似鳳不須誇
君看江上英雄塚只有松根與栢槎

又

鞭後從他素髮兼湧清奔碧冷侵簾高竒章句無人愛
澹泊身心舉世嫌白石橋高吟不足紅霞影暖臥無厭
居山別有非山意莫錯將予比宋纖

又

烏外塵中四十秋亦曾高挹漢諸侯如斯標致雖清拙
大丈夫兒合自由紫木黃菁苗叢叢錦囊香麝語啾啾
終須心到雲溪叟千歲櫛根雪滿頭

又

慵甚嵇康竟不迴何妨方寸似寒灰山精日作兒童出
仙者時將玉器來筠帚掃花驚睡鹿地壚燒樹帶枯苔
不行朝市多時也許史張金安在哉

又

心心心不住希夷石屋巉巖鬢髮垂養竹不除當路筍
愛松留得礙人枝焚香開卷霞生砌捲箔冥心月在池
多少故人頭盡白不知今日又何之

又

龍藏琅函遍九垓霜鍾金鼓振瓊臺堪嗟一句無人得
遂使吾師特地來無角鐵牛眠少室生兒石女老黃梅
令人轉憶龐居士天上人間不可陪

又

五嶽烟霞連不斷三山洞穴去應通
石牕欹枕疎疎雨水碓無人浩浩風
童子念經深竹裏彌猴拾蟲夕陽中
因思往事拋心力六七年來楚水東

又

塵埃中更有埃塵時復雙眉十為顰
賴有年光飛似箭是何心地亦稱人
回賢參孝時時說蜂蠆狼貪日日新
天意剛容此徒在不堪惆悵不堪承

又

翠竇烟巘畫不成
桂香瀑沫雜芳馨
撥霞埽雪和雲母
掘石移松得茯苓
好鳥傍花窺玉磬
嫩苔和水沒金餅
從他人說從他笑
地覆天翻也只寧

又

騰騰兀兀步遲遲
兆朕消磨只自知
龍猛金膏雖未作
孫登土窟且相宜
薜蘿山帔偏能絹
橡栗年糧亦且支
已得真人好消息
人間天上更無疑

又

嵐嫩風輕似碧紗雪樓金像隔烟霞
菖苞玉粉生香壠
菌簇銀釘滿淨楂舉世只知嗟
逝水無人微解悟空花
可憐擾擾塵埃裏雙鬢如銀事似麻

又

千巘萬壑路傾欹杉檜濛濛獨掩扉
斲藥童穿溪磳去
採花蜂冒曉烟歸間行放意尋流水
靜坐支頤到落暉
長憶南泉好言語如斯癡鈍者還稀
南泉大師云學道之人癡鈍者難得

又

一庵冥目在穹冥
菌枕松牀蘚陣青
乳鹿暗行檉徑雪
瀑泉微濺石樓經
間行不覺過天井
長嘯深能動岳靈
應恐無人知此意
非凡非聖獨醒醒

又

慵刻芙蓉傳永漏
休誇麗藻鄙湯休
且為小圃盛紅粟
別有珍禽勝白鷗
拾粟遠尋深澗底
弄猿多在小峰頭
不能更出塵中也
百煉剛為繞指柔

又

業薪心火日燒煎
浪死虛生自古然
陸氏稱龍終妄矣
漢家得鹿更空焉
白衣居士深深說
青眼胡僧遠遠傳
剛地無人知此意
不堪惆悵落花前

又

露滴紅蘭玉滿畦
閒拖象屣到峯西
但令心似蓮花潔
何必身將槁木齊
古壑細香紅樹老
半峯殘雪白猿啼
雖然不是桃源洞
春至桃花亦滿蹊

又

自休自已自安排常願居山事偶諧僧採樹衣臨絕壑

金華山出樹衣僧多採為蔬菜味極美也 狖爭山果落空階閒擔茶器緣青

障靜衲禪袍坐綠崖虛作新詩反招隱出來多與此心

乖

又

石鑪金鼎紅蕖嫩香閣茶棚綠巘齊塢燒崩騰奔澗鼠
巖花狼籍鬪山雞蒙莊環外知音少阮籍途窮旨趣低

應有世人來覓我水重山疊幾層迷

又

自古浮華能幾幾逝波終日去滔滔漢王廢苑生秋草
吳主荒宮入夜濤滿屋黃金機不息一頭白髮氣猶高
豈知知足金仙子霞外天香滿毳袍

又

如愚何止直如弦只合深藏碧嶂前但見山中常有雪
不知世上是何年野人愛向庵前笑赤獾頻來袖畔眠

只有逍遙好知己何須更問洞中天

又

丈公放鶴情相似范泰論交趣不同
有念盡為煩惱相無私方稱水晶宮
香焚薝蔔諸峯曉珠搯金剛萬境空
若買山資言不及恒河沙劫用無窮

七言絕句

再逢虛中道士三首

天目西峯古壞壇壇邊相別雪漫漫
如今四十餘年也

還共當時恰一般

又

囊裏靈龜小似錢道伊年與我同年壺中長挈天相逐
何處昇天更有天

又

吾道將君道且殊君鬚全似老君鬚尋常有語爭堪信
愛說蟠桃似甕麤

禪月集卷二十三

欽定四庫全書

禪月集卷二十四

唐 釋貫休 撰

七言律詩

上盧使君二首

一領彤弓下赤墀
惟將清淨作藩籬
馬卿山岳金相似
張緒風情柳不如

不如當
作怨卑

心染烟霞新句出
筆驅奸蠹

宿根隨鄱陽黎庶
還堪羨頭有重天
足有甃

又

司馬遷文亞聖人三頭九陌碾香塵盡傳棣萼麟兼鳳
終作昌朝甫與申樓聳嬌歌疎雨過風含和氣滿城春
因知寰海昇平去又見高宗夢裏人

陪馮使君遊六首

登干霄亭

擁翠捫蘿山屐輕飄飄紅旆在青冥仙科朱紱言非貴
溪鳥林泉癖愛聽古桂林邊碁局濕白雲堆裏茗烟青

因思廬岳彌天客手把金書倚石屏

遊靈泉院

珂珮喧喧滿路歧
亂泉聲裏扣禪扉
對花語合希夷境
坐石苔黏黼黻衣
鳥啄古杉雲冉冉
風吹清磬露霏霏
惠巖亦有孤峰在
只戀繡經未得歸

過相思嶺

馨自馨香道自怡
相思嶺上却無機
荒渠葉覆深霞在
片石人吟一鳥飛
何處風砧傳古曲
誰家塚樹掛斜暉

因思往事真堪笑，鶴背魚竿未是歸。

錦沙墩

臨水登山興自奇，錦沙墩上最多時。雖云髮白孤峰好，
其奈名清聖主知。草媚蓮塘資逸步，雲生松壑有新詩。
翛然別是神仙趣，豈羨東山妓樂隨。

釣罾潭

境靜江清無事時，紅旌畫鷁動漁磯。心期只是行春去，
日暮還應待鶴歸。風破綺霞山寺出，人歌白雪島花飛。

自憐亦在僊舟上玉浪翻翻濺草衣

迎仙閣

澗香霞影遶樓臺捲箔凭闌耳目開
況從旌旗近鸞鳳可憐談笑出塵埃
火雲不入長松徑露茗何須白玉杯
誰道迎仙仙不至今朝還有謝公來

賀雨上王使君二首

一片丹心合萬靈應時甘雨帶龍腥
驅塵煞燒連窮

闕

電衝霓滿窳冥處處已知倉廩溢家家皆歇管絃聽

應須蚤勒南山石王霸清風滿內庭

又

由來天贊德惟馨朋禱心期事盡行玄妙久聞談佛母

公久與東村大願和尚
談般若般若者佛母也

感通今日見神明破除秋熱飄

蕭盡還似春時散漫傾他日為霖亦如此諸生無不沐
經營

感懷寄盧給事二首

緜緜遠念近來多喜鵲隨函到綠蘿雖匪二賢曾入洛

忽驚六義減沉疴童扳鄰杏墮牆瓦燕啄花泥落砌莎
好更因人寄消息沃州歸去已蹉跎

又

常憶團圓繡像前東歸經亂獨生全孤峰已住六七處
萬事無成三十年每想苑牆危逼路更思鉢塔曉凌烟
如今憔悴荆枝盡一諷來書一愴然

賀鄭使君

三衢蜂蠆陷城池八詠龍韜整武貌纔諭危亡書半幅

便思父母淚雙垂

時公檄書繞去即便歸降來款云思父母則血液雙垂憶兄弟乃江山隔

越戈收甲東投仁境汗浹魂飄拜虎旗死地再生知德

重精兵連敵覺山移人和美叶禎祥出陣善深為典教

推仗信輸誠方始是執俘折馘欲何為清威嚴令無纖

塹長路深山不拾遺七邑恩波歌浩渺一方雲物自鮮

竒天文仰視同諸掌劔術無前更數誰戰馬閒眠汀草

遠秋輦乾揭岳霞隳義為土地精靈伏仁作金湯鐵石

卑龔遂劉寬同煦嫗張飛關某太驅馳笙歌席上偏憐

容刀劔林中亦念詩穀渚美為長飲水金山高作受降
碑時猶草草秋方盡陳是堂堂孰敢窺寵渥豈惟分節
鉞勲庸須勒上鍾彝神資天贊誰堪比名遂功成自不
知捲箔倚闌雲欲雪擁鑪傾榼酒如飴扶堯社稷常憂
老到郭汾陽亦未遲釋子沾恩無以報只將葑菲賀階
墀

送鄭使君

刺婺廉閩動帝臺唯將清淨作梯媒綠沈槍卓妖星落

白玉壺澄苦霧開仁愛久懸溪上月恩光又發嶺頭梅
天資劉邵龔黃筆神助韓彭衛霍才古驛劍江分掩映
畫旗花舫下喧飀鳳麟帝幕芙蓉拆洞壑清威霹靂來
禮樂封疆添禮樂塵埃時節勿塵埃荔支花下驅千騎

蒼苔菊林中禮萬迴

時八安大師
在回院也

視事蠻奴磨玉硯邀賓

海月射金盃謳歌合合千門樂輦角雄雄一閣雷君父
恩深頭早白子孫榮襲日難陪東陽緇素如何好空向
生祠祝上台

贈陽公杜之舅

分盡君憂一不遺，鳳書徵入萬民悲。
風雲終日如相逐，雨露前程即可知。
畫舸還盛江革石，秋山又看謝安基。
談諧盡是經邦術，頭角由來出世姿。
天地事須歸橐籥，文章誰得到呆恩。
扣舷傍島清吟健，問俗看漁晚泊遲。
霞影滿江搖枕簟，鳥行和月下漣漪。
周秦漢魏書書在，麟鳳龜龍步步隨。
金殿恩波將浩浩，圭峰意緒謾孜孜。
郡中條令春常在，境外訶謠美更奇。
道者藥壚留要妙

林僧禪偈寄相思王楊盧駱真何者房杜蕭張更是誰
應念衢民千萬戶家家皆置一生祠

遊金華山禪院

茲地曾棲菩薩僧旃檀樓殿瀑崩騰因知境勝終難到
問著人來悉不曾斜谷暗藏千載雪薄嵐常翳一龕燈
多慙不及當時海又下差我一萬層

七言絕句

寄鄭道士二首

常憶蘇耽好羽儀，信安山觀住多時。
不知玉質雙栖處，兩箇仙人是阿誰。

又

誰帶金輪髻裏珠，何妨相奉上清都。
舊山大有閒田地，五色香茆有子無。

送少年禪師二首

秀眉清目樹花衣，一鉢隨緣智不知。
佛與輪王嫌不作，世間剛有箇癡兒。

又

萬水千山一鶴飛，豈愁遊子暮何之？古今此著無人會，
王積新輪更不疑。

古劍池

秋水蓮花三四枝，我來慷慨步遲遲。不決浮雲斬邪佞，
真成龍去擬何為？

曹娥碑

高碑說爾孝，應難彈指端。思白浪間堪歎，行人不迴首。

前山應是苧蘿山

比干傳

昏王亡國豈堪陳
只見明誠不見身
想得先生也知自
欲將留與後來人

送人遊茆山

鳥啼花笑煖紛紛
路入青霞白石門
君到前頭好看好
老僧或恐是茆君

聞杜宇

金定四八
卷二十四
咽雨哀風更不停春光於爾豈無情宜須喚得謝豹出
方始年年無此聲

聽曉角

三會單于滿閣風五行無忒月朦朧如何十萬家休戚
只在嗚嗚咽咽中

春送僧

蜀魄關關花雨深送師衝雨到江潯不能更折江頭柳
自有青青松栢心

問漁人

風惡波狂身更悶
滿頭霜雪背青山
相逢略問家何在
迴覩蘆花蒼莽間

律師

蘆蔔花紅徑草青
雪膚冰骨步輕輕
今朝暫到焚香處
只恐牀前有蟲聲

禪月集卷二十四

欽定四庫全書

禪月集卷二十五

唐 釋貫休 撰

七言律詩

宿赤松山觀題道人水閣兼寄郡守

珠殿香輶倚翠稜寒棲吾道寄孫登豈應肘後終無分
見說仙中亦有僧雲斂石泉飛險竇月明山鼠下枯藤
還如華頂清談夜因有新詩寄鄭弘

春遊涼泉寺

一到涼泉未擬歸，迸珠噴玉落階除。
幾多僧祇因泉在，無限松如潑墨為。
雲壑含香啼鳥細，茗甌擎乳落花遲。
青山看著不可上，多病多慵爭奈伊。

經吳宮

夫差昏暗霸圖傾，千古淒涼地不靈。
妖艷恩餘宮露濁，忠臣心苦海山青。
蕭條陵隴侵寒水，彷彿樓臺出杳冥。
此是前車況非遠，六朝何更不惺惺。

送薛侍郎貶峽州司馬

得罪唯驚恩未酬
夷陵山水稱閒遊
人如八凱須當國
狹到三聲不用愁
花落扁舟香冉冉
草侵公署雨脩脩
因人好寄新詩好
不獨江東有沃州

將入匡山宿韓判官宅

一宿蘭堂接上才
白雲歸去幾徘徊
黛青峰朶孤吟後
雪白猿兒必寄來
簾卷茶烟縈墮葉
月明碁子落深苔
明朝江上空迴首
始覺清風不可陪

送鄭侍郎騫赴闕

文章國器盡琅玕朝騎駸駸歲月殘
彩筆祇宜天上用繡衣偏稱雪中看
休驚斷雁離三楚漸入祥烟下七槃
翰苑舊知憑與說紫金輪畔寄書難

上盧使君

一別旌旗已一年二林真子勸安禪
常思雙戟華堂裏還似孤峰峭壁前
步出林泉多吉夢帆侵分野入祥烟
自憐酷似隨陽雁霜打風飄到日邊

寄匡山大願和尚

一聽玄音下竹亭却思牕雪與囊螢祇將清淨酬恩德
敢信文章有性靈夢歷山牀聞鶴語吟思海月上沙汀
不堪迴首滄江上萬仞廬峰在杳冥

別盧使君歸東陽二首

雨氣濛濛草滿庭式微吟劇更誰聽詩逢匠化唯貪住
日覺恩深不易銘心苦祇應消鬢黑夢遊頻入倚天青
從茲還似歸回首唯祝台星與福星

又

家在嚴陵釣渚旁，細連嘉樹拂牕涼。
難醫林藪烟霞癖，又出芝蘭父母鄉。
孤帆好風千里煥，深花黃鳥一聲長。
終期金鼎調羹日，再近尼山日月光。

溪寺水閣間眺因寄宋使君

溪木蕭條一凭闌，玉霜飛後浪花寒。
釣魚船上風煙暝，古木林中砧杵乾。
至竟道心方始是，空耽山色亦無端。
誰知太守分憂外，時把西經盡日看。

春送趙文觀送故合州座主神櫬歸洛

喜繼于悲錦水東還鄉仙騎却尋高再燒良玉堯雲動
方報深恩絳帳空遠道靈輶春欲盡亂山羸馬恨無窮
他年必立吾君側好把書紳答至公

先輩桂人
曹鄴郎中

禪月集卷二十五

欽定四庫全書

禪月集卷二十六

唐 釋貫休 撰

補遺

晉光大師草書歌

雪壓千峰橫枕上窮困雖多還激壯看師逸蹟兩相宜

高適歌行李白詩海上驚驅山猛燒

一作海上風
驚驅猛燒

吹斷

狂烟著沙草江樓曾見落星石幾回試發將軍砲別有

寒鵬掠絕壁提上玄猿更生力又見吳中磨角來舞槊
盤刀初觸擊好文天子揮宸翰御製本多堆玉案晨開
水殿教題壁題罷紫衣親寵錫僧家愛詩自拘束僧家
愛畫亦局促惟師草聖藝偏高一掬山泉心便足

擬苦寒行

北風北風職何嚴毒摧壯士心縮金烏足凍雲翼翼礙
雪一片下不得聲遶枯桑根在沙塞黃河徹底頑直到
海一氣搏束萬物無態惟有吾庭前杉松樹枝枝健

在

賦題成都玉局觀孫位畫龍

位東越人傳宋南巡隨入蜀後改名遇

我見蘇州崑山佛殿中金城柱上有二龍老僧相傳道
是僧繇手尋常入海共龍鬪又聞蜀國玉局觀有孫遇
蹟蟠屈身長八十尺遊人爭看不敢近頭觀寒泉萬丈

碧

觀地獄圖

峨峨非劍閣有樹不堪攀佛手遮不得人心似等閒周

王應未雪白起作何顏盡日空彈指茫茫塵世間

贈雷卿張明府

任官征戰後度日寄閒身封卷還高客飛書問野人廢
田教種穀生路遣尋薪若起柴桑興無先漉酒巾

獻錢尚父

貴逼人來不自由龍驤鳳翥勢難收滿堂花醉三千客
一劍霜寒十四州鼓角揭天嘉氣冷風濤動地海山秋
東南永作金天柱誰羨當時萬戶侯

繡州張相公見訪

德符唐德瑞通天曾叱讒諛五座前千襲彩衣宮錦薄
數牀御札主恩偏出師暫放張良著得罪惟撐范蠡船
未報君恩終必報不妨金地禮青蓮

題某公宅

宅成天下借圖看始笑平生眼力慳地占百灣多是水
樓無一面不當山荷深似入茗溪路石怪疑行雁蕩間
只恐中原方鼎沸天心未遣主人閒

海覺禪師山院

人言海覺老宗師，隱絕層巔世莫知。
青草不生行道跡，白雲常護坐禪扉。
六環金錫飛來後，一派銀河瀉落時。
借問大心能濟物，龍門風電捲天池。

悼張道古

昭宗時道古官拾遺
以直諫貶蜀中死

清河逝水太怱怱，東觀無人識至公。
天上君恩三載隔，鑑中鸞影一時空。
墳生苦霧蒼茫外，門掩寒雲寂寞中。
惆悵斯人又如此，一聲蠻笛滿江風。

月夕

霜月夜徘徊樓中羌笛催曉風吹不盡江上落殘梅

夜雨

夜雨山草濕爽籟雜枯木間吟竺仙唱清絕過於玉

晚望

落日碧江靜蓮唱清且閒更尋花發處借月過前灣

早霜寄蔡大

昨夜楚鐘鳴飛霜下楚城定知遷客鬢先向鑑中生

贈寫經僧楚雲

剔皮刺血誠何苦為寫靈山九會文十指瀝乾終七軸
後來求福更無君

摘句

今日再三難更識識辭惟道待錢來
鴈蕩經行雲漠漠龍湫宴坐雨濛濛
刻成箏柱鴈相挨

黃昏風雨黑如磐別我不知何處去

郭尚父休誇塞北裴中令莫說淮西

萬計交人買華軒保惜深

如何忠為主至竟不封侯

但看千騎去知有幾人歸

朱門當大道風雨立多時

一生不蓄買田錢華屋何心亦偶然客至多逢僧在坐

釣歸惟許鶴隨船

家為買琴添舊價厨因養鶴減晨炊

粘粉為題棲鳳竹帶香因洗落花泉

貫休集名不一卷次亦不倫計氏云西岳集十卷吳融為之序蓋乾寧三年編於荆門者也或又云南岳集謂曾隱跡南嶽也馬氏云寶月詩一卷未知何據其弟子曇域于偽蜀乾德五年編集前後歌詩文贊題曰禪月集重為之序謂吳序或以文害辭或以辭害志或以誕飾饒借殊不解休公意也宋人相傳凡三十卷余從江

左名家大索十年僅得二十五卷其文贊及獻
武肅王詩五章章八句俱不載不無遺珠之憾
今畧補一二於後又工書人號姜體以其俗姓
姜也不知者指為姜白石何異章艸緣章帝得
名誤稱章氏艸書耶又善畫羅漢郭若虛云是
休公入定觀羅漢真容後寫之故悉是梵相形
骨古怪余曾三見卷軸或水墨或設色未知誰
是強氏藥肆中物余家藏一十六幅其中伏虎

尊者偏袒倚杖凝然不動虎蹲座下如祥麟馴
驥又一幅寫侍者揭瓶傾水龍從瓶中騰起雲
端尊者托鉢仰視龍湧雲徐徐而下絕無生擒
活掣張奉瞋目之狀豈庸工俗師能著一筆至
若布景陳器凡軍遲鍵鎗震越摩羅俱蘇摩刺
竭節佉陀尼憍奢耶之類種種奇妙絕非耳目
間物圖畫見聞志云有真本在豫章西山雲堂
院供養于今郡將迎請祈雨無不應驗其落歛

云大蜀國龍樓待詔明因辨果功德大師翔麟
殿引駕內供奉經律論道門選練教授三教玄
逸大師守兩川僧錄大師食邑三千戶賜紫大
沙門云虞山毛晉識

休公遍謁諸鎮帥每以詩句不合而去初謁荆
州中令成汭汭問其筆法答曰此事須登壇而
授豈可草草而言汭怒遞放黔中因為病鶴詩
云見說氣清邪不入不知爾病自何來後避亂

渚宮荆帥高氏優待之館於龍興寺感時政乃
作酷吏詞以刺之復被黜鬱悒中題研子云低
心蒙潤久入匣始身安弟子以為匣者峽也相
勸入蜀遂離荆門直趨井絡上蜀主王建陳情
篇禮遇甚厚留居東禪院二年建龍華召令誦
近詩時貴戚同座休公欲諷之作公子行貴倖
皆不悅先是錢鏐自稱吳越國王休公以詩投
之有一劍霜寒十四州之語鏐令改為四十州

乃可相見休曰州亦難添詩亦難改孤雲野鶴
何天不可飛乃入豫章之西山後入蜀此事見
釋氏通鑑唐詩紀事亦然惟高僧傳云獻詩甚
愜王旨遺贈亦豐復考吳越備史暨錢氏功臣
碑則知贊公之說謬矣晉又識

禪月集卷二十六

禪月集後序

門人慧光大師賜紫曇域述

有唐翰林學士兵部侍郎吳融請為叙先師長謂吾門人曰吳公文藻瞻逸學海淵深或以揖讓周旋相待矣或以文害辭或以辭害志或以誕飾饒借則殊不解我意也子可於余所著之末仰重序之曇域乃稽顙而言曰語云子疾病子路使門人為臣子曰欺天乎曇域小子何敢叙焉師曰子不知皆孔子弟子記諸善言以成

其書況吾常酷於茲心勦形瘵訪竒稽古慰以大道曠
然皓首豈為賈其聲耳且吾昔在吳越間靡所濟集聊
欲係志於翰墨得以亂思不愆遺老矣子無辭焉但當
吾意而言之然又不可以過之樂天長吉似之矣吾若
與騷人同時即知殊不相屈耳直言之無相辱也曇域
遜讓不暇力而序之

序

先師名貫休字德隱婺州蘭溪縣登高里人也俗姓姜

氏家傳儒素代繼簪裾少小之時便歸覺路于安和寺
請圓貞長老和尚為師日念法華經一千字數月之內
念畢茲經先師與鄰院童子法號處默偕年十餘歲同
時發心念經每於精修之暇更相倡和漸至十五六歲
詩名益著遠近皆聞年二十歲受具足戒後於洪州開
元寺聽法華經不數年間親敷法座廣演斯文邇後兼
講起信論可謂三冬涉學百舍求師尋妙旨于未傳起
微言于將絕于時江表士庶無不欽風年齒漸高屬天

下喪亂時處默和尚謂師曰吾師抱不羈之才懷自然之道時不與我誠無傷哉復謂先師曰分袂無血淚望處空闌千後隱南嶽深居不出先聃為備者曰吾聞岷峨異境山水幽竒四海騷然一方無事遂乃過洞庭趨渚宮歷白帝旋聞大蜀開基創業奄有坤維歎曰不有君子寧能國乎遂達大國進上蜀高祖詩其畧曰一瓶一鉢垂垂老千水千山得得來高祖禮待膝之前席過秦主待道安之禮踰趙王迎圖澄之儀特修禪宇懇請

住持尋賜師號曰禪月大師曲加存恤優異殊常十年
以來迥承天眷無何壬申歲十二月召門人謂曰古人
有言曰地為牀兮天為蓋物何小兮物何大苟愜心兮
自欣泰身與名兮何足賴吾之治世亦何久耶然吾啟
手足曾無愧心汝等以吾平生事之以儉可於王城外
藉之以草覆之以紙而藏之慎勿動衆而厚葬焉言訖
奄然而絕息遂具表以聞帝感然久之乃命所司備一
期葬事於時在城士庶無不悲傷曇域遂以先師遺言

上奏請以薄葬之禮帝曰朕治命可行焉勅令四衆共
助葬儀特豎靈塔敕謚白蓮之塔以癸酉年三月十七
日於成都北門外十餘里置塔之所地號昇遷葬事既
周哀制斯畢暇日或勸賢見訪或朝客相尋或有念先
師一篇兩篇或記三句五句或未閑深旨或不曉根源
衆請曇域編集前後所製歌詩文贊日有見問不暇枝
梧遂尋檢藁草及暗記憶者約一千首乃雕刻成部題
號禪月集曇域雖承師訓藝學無聞曾奉告言輒直序

事時大蜀乾德五年癸未歲十二月十五日序

時嘉熙四年五月十五日婺州蘭谿縣兜率禪寺

住持賜紫禪悟大師可燦重刊

右禪月集吾里高僧貫休所作唐末生於里之登高幼
而穎悟志慕空門祝髮受業于安和寺游江右歷湖南
晚遇蜀主終焉詩不苟作頌詠諷刺根於理致法嗣曇
域編萃成集雕刻以廣其傳安和今改兜率禪寺詩集
闕焉無聞住山率他郡人或縛于禪寂而不肯為或迫

於營造而不暇為或利於赴應而不克為識者恨之鄙
松庵燦禪師出于越趙福王之門王之孫國史左司宗
卿守婺時招致居焉恬澹無營得浮屠氏本體掛錫之
初訪予山中故事首以是對師慨然任責尋求故帙得
于里中檀越之家計工食費數萬而贏先捐鉢中所有
不足則募衆緣鳩工鋟梓不日而成既成求紀歲月竊
謂越五季及我宋多歷年所釋家者流豈無一二好事
而不能使此詩與此山俱為不朽今師乃度越前輩創

出一段奇事以為動心駭目之觀志可尚已是烏可以不書嘉熙戊戌孟春朔旦龜溪周伯奮謹跋

大蜀國龍樓待詔明因辨果功德大師祥麟殿首座
引駕內供奉講唱大師道門弟子仗選鍊校授文章
應制大師兩街僧錄封司空太僕卿雲南八國鎮國
大師左右街龍華道場對御講讚大師兼禪月大師
食邑八千戶賜紫大沙門貫休

禪月真堂

無為楊傑

童子依師蘭水濱聲名真是碧雲人定中傳得阿羅漢
十六身中第幾身

嚴韻上和

濟陽江行


瓶鉢遠離澱水濱
知心曾有幾多人
無為一見分明識
指點堂頭是後身

見兜率寺舊功德載成一絕句

一去鄉間八易年
生還幸見舊因緣
却嗟勝事今難作
自善當時信力堅

番陽松庵璨上人來徃吾鄉兜率有年矣予偶到彼
因言西岳集禪月貫休所作也先世嘗收於書室璨

老有請謂其徒喜聞樂道而未得全集欲攻木廣其
傳余嘉其用心勉成其志遂檢茲集與之仍薄助鋟
版畢復請紀其事庶後有考於斯嘉熙戊戌九日孟
湖童必明書



禪月集後序